

ओं नमः परमात्मने, श्री महागणपतये नमः,  
श्री गुरुभ्यो नमः, हरिः ओं  
—

कृष्ण यजुर्वेदीय तैत्तिरीय संहिता पद पाठः  
(वाक्य सहित)

चतुर्थकाण्डे पञ्चमः प्रश्नः

**Notes:**

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site [www.vedavms.in](http://www.vedavms.in)

## **Table of Contents**

**4 कृष्ण यजुर्वेदीय तैत्तिरीय संहितायां पद पाठे चतुर्थ  
काण्डं 3**

**4.5 चतुर्थकाण्डे पञ्चमः प्रश्नः – होमविधिनिरूपणं ..... 3**

ओं नमः परमात्मने, श्री महागणपतये नमः,

श्री गुरुभ्यो नमः , हरिः ओं

## 4 कृष्ण यजुर्वेदीय तैत्तिरीय संहितायां पद पाठे चतुर्थ काण्डं

### 4.5 चतुर्थकाण्डे पञ्चमः प्रश्नः – होमविधिनिरूपणं

#### 4.5.1.1

नमस्ते रुद्र मन्यव उतोत इषवे नमः ।  
नमस्ते अस्तु धन्वने बाहुभ्यामुत ते नमः ।  
या त इषुः शिवतमा शिवं बभूव ते धनुः ।  
शिवा शरव्या या तव तया नो रुद्र मृडय ।  
या ते रुद्र शिवा तनूरघोरा ऽपापकाशिनी ।  
तया नस्तनुवा शन्तमया गिरिशन्ताभि चाकशीहि ।  
यामिषुं गिरिशन्त हस्ते – [ ] 1

**4.5.1.1- Padam**

नमः॑ । ते॒ । रु॒द्र । म॒न्यवे॑ ॥ उ॒तो इति॑ । ते॒ । इ॒षवे॑ । नमः॑ । नमः॑ ।  
ते॒ । अ॒स्तु । ध॒न्वने॑ । बा॒हुभ्यामि॑ति बा॒हु-भ्याम् । उ॒त । ते॒ । नमः॑ ।  
या । ते॒ । इ॒षुः । शि॒वतमे॑ति शि॒व - त॒मा । शि॒वम् । ब॒भूव॑ । ते॒ ।  
ध॒नुः । शि॒वा । श॒रव्या॑ ॥ या । तव॑ । तया॑ । नः॑ । रु॒द्र । मृ॒डय॑ । या ।  
ते॒ । रु॒द्र । शि॒वा । त॒नूः । अ॒घोरा॑ । अ॒पापका॑शिनीत्यपाप-का॒शिनी॑ ।  
तया॑ । नः॑ । त॒नुवा॑ ॥ श॒न्तम॑येति शं - त॒मया॑ । गि॒रिश॑न्तेति  
गि॒रि - श॒न्त । अ॒भीति॑ । चा॒कशी॑हि । या॒म् । इ॒षुम् ।  
गि॒रिश॑न्तेति गि॒रि - श॒न्त ॥ ह॒स्ते । 1 (50)

**4.5.1.2**

बि॒भर्ष्य॑स्तवे॑ । शि॒वां गि॒रित्र॑ तां कुरु॑ मा हि॒ंसीः॑ पु॒रुषं॑ जगत् ।  
शि॒वेन॑ वच॒सा त्वा॑ गि॒रिशा॑च्छा वदाम॒सि ।  
यथा॑ नः॑ स॒र्वमि॑-ज्जगद॒यक्ष्मं॑ सु॒मना॑ असत् ।  
अ॒द्ध्यवो॑चदधि॒वक्ता॑ प्र॒थमो॑ दै॒व्यो भि॑षक् ।  
अ॒ही॑श्च॒ सर्वा॑न् ज॒भय॑न्त् सर्वा॑श्च या॒तु धा॒न्यः ।

अ॒सौ॑ य॒स्ता॒म्रो अ॒रु॒ण उ॒त ब॒भ्रुः॑ सु॒म॒ङ्ग॒लः॑ ।

ये चे॒माꣳ रु॒द्रा अ॒भितो॑ दि॒क्षु – [ ] 2

#### **4.5.1.2 - Padam**

बि॒भर्षि॑ । अ॒स्तवे॑ । शि॒वाम् । गि॒रि॒त्रेति॑ गि॒रि – त्र । ता॒म् । कुरु॑ ।  
मा । हि॒ꣳसीः॑ । पु॒रुष॑म् । जग॑त् । शि॒वेन॑ । व॒चसा॑ । त्वा । गि॒रि॒श ।  
अच्छ॑ । व॒दाम॑सि । यथा॑ । नः॑ । स॒र्वम् । इत् । जग॑त् । अ॒यक्ष॑मम् ।  
सु॒मना॑ इति॑ सु – म॒नाः॑ । अ॒सत् । अधी॑ति । अ॒वोच॑त् ।  
अधि॑व॒क्तेत्य॑धि – व॒क्ता । प्र॒थमः॑ । दै॒व्यः॑ । भि॒षक् । अ॒हीन् । च ।  
स॒र्वान् । ज॒भय॑न् । स॒र्वाः॑ । च । या॒तुधा॑न्य इति॑ या॒तु – धा॑न्यः ।  
अ॒सौ । यः । ता॒म्रः । अ॒रु॒णः । उ॒त । ब॒भ्रुः । सु॒म॒ङ्ग॒ल इति॑  
सु – म॒ङ्ग॒लः॑ । ये । च । इ॒माम् । रु॒द्राः । अ॒भितः॑ । दि॒क्षु । 2 (50)

#### **4.5.1.3**

श्रि॒ताः स॒हस्र॑शो ऽवै॒षाꣳ हे॒ड ई॒महे॑ ।  
अ॒सौ यो॑ ऽव॒सर्प॑ति नी॒लग्री॑वो वि॒लो॒हितः॑ ।  
उ॒तैनं॑ गो॒पा अ॒दृश॑न्-न॒दृश॑न्-नु॒दहा॑र्यः ।

उ॒तैनं॑ वि॒श्वा भू॒तानि॑ स दृ॒ष्टो मृ॒डया॑ति नः ।  
नमो॑ अस्तु नी॒लग्री॑वाय स॒हस्रा॑क्षाय मी॒ढुषे॑ ॥  
अथो॑ ये अस्य स॒त्त्वानो॑ऽहं तेभ्यो॑ ऽकर॒न्नमः॑ ।  
प्रमु॑ञ्च ध॒न्वन॑स्त्व मु॒भयो॑-र॒र्णियो॑र्ज्या ।  
याश्च॑ ते हस्त इ॒षवः॑ - [ ] 3

#### **4.5.1.3 - Padam**

श्रि॒ताः । स॒हस्र॑श इति स॒हस्र॑ - शः । अवे॑ति । ए॒षाम् । हे॒डः ।  
ई॒महे॑ । अ॒सौ । यः । अ॒वस॑र्पतीत्य॒व - सर्प॑ति । नी॒लग्री॑व इति  
नी॒ल - ग्री॒वः । वि॒लो॒हित॑ इति वि - लो॒हितः॑ । उ॒त । ए॒नम् । गो॒पा  
इति॑ गो - पाः । अ॒दृश॑न् । अ॒दृश॑न् । उ॒दहा॑र्य इत्यु॒द - हा॑र्यः ।  
उ॒त । ए॒नम् । वि॒श्वा । भू॒तानि॑ । सः । दृ॒ष्टः । मृ॒डया॑ति । नः । नमः॑ ।  
अस्तु॑ । नी॒लग्री॑वायेति नी॒ल - ग्री॒वाय॑ । स॒हस्रा॑क्षायैति  
स॒हस्र॑ - अ॒क्षाय॑ । मी॒ढुषे॑ ॥ अथो॑ इति । ये । अस्य॑ । स॒त्त्वानः॑ ।  
अ॒हम् । तेभ्यः॑ । अ॒कर॑म् । नमः॑ । प्रेति॑ । मुञ्च॑ । ध॒न्वनः॑ । त्वम् ।

उ॒भयोः॑ । आ॒र्नियोः॑ । ज्या॒म् । याः । च । ते । ह॒स्ते॑ ।

इ॒षवः॑ । 3 (50)

**4.5.1.4**

परा॒ ता भ॑गवो वप ।

अ॒वत॑त्य ध॒नुस्त्व॑ सह॒स्राक्ष॑ श॒तेषु॑धे ।

नि॒शीर्य॑ श॒ल्यानां॑ मु॒खा शि॒वो नः॑ सु॒मना॑ भव ।

वि॒ज्यं ध॒नुः क॑प॒र्दिनो॑ वि॒शल्यो॑ बा॒णवा॑ उ॒त ।

अ॒ने॒शन्न॑स्ये॒षव आ॑भुर॒स्य नि॑षङ्ग॒थिः ।

या ते॑ हे॒ति-मी॑दुष्ट॒म ह॒स्ते ब॒भूव॑ ते॒ धनुः॑ ।

तया॑ऽस्मान् वि॒श्वत॑ स्त्व॒मय॑क्ष्मया॒ परि॑ब्भुज ।

नम॑स्ते अ॒स्त्वायु॑धाया-ना॒तताय॑ धृ॒ष्णवे॑ ।

उ॒भाभ्या॑ ( ) मु॒त ते॒ नमो॑ बा॒हुभ्यां॑ तव॒ धन्व॑ने ।

परि॑ ते॒ धन्व॑नो हे॒तिर॒स्मान् वृ॑णक्तु वि॒श्वतः॑ ।

अथो॒ य इ॒षुधि॑स्त॒वारो अ॒स्म-न्नि॑धेहि तं । 4

**4.5.1.4 - Padam**

प॒रेति॑ । ताः । भ॒गव॑ इति॑ भ॒ग – वः । व॒प । अ॒वत॑त्येत्य॑व – त॒त्य ।  
ध॒नुः । त्व॒म् । स॒हस्रा॑क्षेति॑ स॒हस्र॑ – अ॒क्ष । श॒र्तेषु॑ध इति॑  
श॒त – इ॒षुधे॑ । नि॒शीर्ये॑ति॑ नि-शीर्य॑ । श॒ल्याना॑म् । मु॒खा । शि॒वः ।  
नः । सु॒मना॑ इति॑ सु – म॒नाः । भ॒व । वि॒ज्यमि॑ति॒ वि – ज्य॑म् ।  
ध॒नुः । क॒प॒र्दिनः॑ । वि॒शल्य॑ इति॑ वि – श॒ल्यः । बा॒णवा॑निति॑  
बा॒ण – वा॒न् । उ॒त । अ॒ने॒शन् । अ॒स्य । इ॒षवः॑ । आ॒भुः । अ॒स्य ।  
नि॒षङ्ग॑थिः । या । ते । हे॒तिः । मी॒ढुष्ट॑मेति॑ मी॒ढुः – त॒म । ह॒स्ते ।  
ब॒भूव॑ । ते । ध॒नुः । तया॑ । अ॒स्मान् । वि॒श्वतः॑ । त्व॒म् । अ॒यक्ष्म॑या ।  
प॒रीति॑ । भु॒ज । न॒मः । ते । अ॒स्तु । आ॒यु॒धाय॑ ।  
अ॒ना॒त॒ताये॑त्य॒ना – त॒ताय॑ । धृ॒ष्णवे॑ । उ॒भाभ्या॑म् ( ) । उ॒त । ते ।  
न॒मः । बा॒हुभ्या॑मिति॑ बा॒हु – भ्या॑म् । तव॑ । ध॒न्वने॑ । प॒रीति॑ । ते ।  
ध॒न्वनः॑ । हे॒तिः । अ॒स्मान् । वृ॒णक्तु॑ । वि॒श्वतः॑ । अ॒थो इति॑ । यः ।



इ॒षु॒धि॒रि॒ती॒षु॒-धिः॑ । तव॑ । आ॒रे । अ॒स्मत् । नी॒ति । धे॒हि ।

तम् । 4 (72)

(ह॒स्ते॑ - दि॒क्ष्वि - ष॒व - उ॒भा॒भ्यां॑ - द्वा॒वि॒ंश॑तिश्च) (A1)

#### 4.5.2.1

नमो॑ हि॒रण्य॑ बा॒हवे॑ से॒नान्ये॑ दि॒शांच॑ प॒तये॑ नमो॑  
नमो॑ वृ॒क्षे॒भ्यो॑ हरि॒केशे॑भ्यः प॒शूनां॑ प॒तये॑ नमो॑  
नमः॑ स॒स्वि॒ञ्ज॒राय॑ त्वि॒षी॒मते॑ प॒थी॒नां प॒तये॑ नमो॑  
नमो॑ ब॒भ्लु॒शाय॑ वि॒व्या॒धिने॑-ऽन्ना॒नां प॒तये॑ नमो॑  
नमो॑ हरि॒केशा॑यो-प॒वी॒तिने॑ पु॒ष्टा॒नां प॒तये॑ नमो॑  
नमो॑ भ॒वस्य॑ हे॒त्यै ज॒गतां॑ प॒तये॑ नमो॑  
नमो॑ रु॒द्रा॒या-त॒ता॒विने॑ क्षे॒त्रा॒णां प॒तये॑ नमो॑  
नमः॑ सू॒ता॒या-ह॒न्त्या॒य व॒ना॒नां प॒तये॑ नमो॑ नमो॑ - [ ] 5

#### 4.5.2.1 - Padam

नमः॑ । हि॒रण्य॑बा॒हव॑ इति॑ हि॒रण्य॑ - बा॒हवे॑ । से॒नान्य॑ इति॑  
से॒ना - न्ये॑ । दि॒शाम् । च॒ । प॒तये॑ । नमः॑ । नमः॑ । वृ॒क्षे॒भ्यः॑ ।

हरि॑केशो॒भ्य इति॑ हरि॑ – के॒शो॒भ्यः । प॒शूनाम् । पत॑ये । नमः॑ । नमः॑ ।  
स॒स्मिज्ज॑राय । त्विषी॑मत इति॑ त्विषि॑ – मते॑ । प॒थीनाम् । पत॑ये ।  
नमः॑ । नमः॑ । ब॒भ्लु॒शाय॑ । वि॒व्याधि॑न इति॑ वि – व्याधि॑ने॑ ।  
अ॒न्नानाम् । पत॑ये । नमः॑ । नमः॑ । हरि॑केशायेति॑ हरि॑ – के॒शाय॑ ।  
उ॒पवी॑तिन इत्यु॒प – वी॒तिने॑ । पु॒ष्टा॒नाम् । पत॑ये । नमः॑ । नमः॑ ।  
भ॒वस्य॑ । हे॒त्यै । ज॒गताम् । पत॑ये । नमः॑ । नमः॑ । रु॒द्राय॑ ।  
आ॒त॒तावि॑न इत्या॑ – त॒तावि॑ने॑ । क्षे॒त्राणा॑म् । पत॑ये । नमः॑ । नमः॑ ।  
सू॒ताय॑ । अ॒ह॒न्त्याय॑ । व॒ना॒नाम् । पत॑ये । नमः॑ । नमः॑ । 5 (50)

#### 4.5.2.2

रोहि॑ताय स्थ॒पत॑ये वृ॒क्षाणां॑ पत॑ये नमो॑  
नमो॑ म॒न्त्रिणे॑ वा॒णिजा॑य क॒क्षाणां॑ पत॑ये नमो॑  
नमो॑ भु॒वन्त॑ये वा॒रि॒वस्कृ॑ता-यौष॒धीनां॑ पत॑ये नमो॑  
नम॑ उ॒च्चै-र्घो॑षाया क्र॒न्दय॑ते प॒त्तीनां॑ पत॑ये नमो॑  
नमः॑ कृ॒त्स्न॑वी॒ताय॑ धा॒वते॑ स॒त्त्वनां॑ पत॑ये नमः॑ । 6

**4.5.2.2 - Padam**

रोहि॑ताय । स्थ॑पतये । वृ॒क्षाणा॑म् । पत॑ये । नमः॑ । नमः॑ । मन्त्रि॑णे ।  
वा॒णिजा॑य । क॒क्षाणा॑म् । पत॑ये । नमः॑ । नमः॑ । भुव॑न्तये ।  
वा॒रिव॑स्कृ॒ताये॑ति वा॒रिवः॑ – कृ॒ताय॑ । ओष॑धीनाम् । पत॑ये । नमः॑ ।  
नमः॑ । उ॒च्चैर्घो॑षायेत्यु॒च्चैः॑ – घो॒षाय॑ । आ॒क्रन्द॑यत इत्या॑ – क्रन्द॑यते ।  
प॒त्तीना॑म् । पत॑ये । नमः॑ । नमः॑ । कृ॒थ्सन्वी॑तायेति कृ॒थ्सन्-वी॑ताय ।  
धाव॑ते । सत्त्व॑नाम् । पत॑ये । नमः॑ । 6 (29)

(व॒ना॒नां॑ प॒तये॑ नमो॑ नम॑ – ए॒कान्न॑ त्रि॒श॒च्च॑ ) (A2)

**4.5.3.1**

नमः॑ स॒हमा॑नाय नि॒व्याधि॑न आ॒व्याधि॑नीनां पत॑ये नमो॑  
नमः॑ ककु॒भाय॑ निष॒ङ्गिणे॑ स्ते॒नानां॑ पत॑ये नमो॑  
नमो॑ निष॒ङ्गिण॑ इषु॒धिम॑ते तस्करा॑णां पत॑ये नमो॑  
नमो॑ वञ्च॑ते परि॒वञ्च॑ते स्तायू॑नां पत॑ये नमो॑  
नमो॑ नि॒चेर॑वे परि॒चरा॑यार॒ण्यानां॑ पत॑ये नमो॑  
नमः॑ सृ॒कावि॑भ्यो जिघा॑स्द्भ्यो मु॒ष्णातां॑ पत॑ये नमो॑

नमो॑ ऽसि॒मद्भ्यो॑ नक्तं॑ चर॒द्भ्यः॑ प्रकृ॒न्तानां॑ पतये॑ नमो॑  
नम॑ उ॒ष्णी॒षिणे॑ गिरि॒चराय॑ कुलु॒ञ्चानां॑ पतये॑ नमो॑ नम॑ – [ ] 7

#### 4.5.3.1 - Padam

नमः॑ । सह॒मानाय॑ । नि॒व्या॒धि॒न इति॑ नि – व्या॒धि॒ने॑ ।  
आ॒व्या॒धि॒नीना॑मित्या॑ – व्या॒धि॒नीना॑म् । पतये॑ । नमः॑ । नमः॑ ।  
ककु॒भाय॑ । नि॒षङ्गि॒ण इति॑ नि – सङ्गि॒ने॑ । स्ते॒नाना॑म् । पतये॑ । नमः॑ ।  
नमः॑ । नि॒षङ्गि॒ण इति॑ नि – सङ्गि॒ने॑ । इ॒षु॒धि॒मत इती॑षु॒धि – मते॑ ।  
तस्करा॑णाम् । पतये॑ । नमः॑ । नमः॑ । वञ्च॑ते । परि॒वञ्च॑त इति॑  
परि – वञ्च॑ते । स्ता॒यूना॑म् । पतये॑ । नमः॑ । नमः॑ । नि॒चो॒रव॑ इति॑  
नि – चो॒रवे॑ । परि॒चरा॑येति॑ परि – च॒राय॑ । अ॒रण्या॑नाम् । पतये॑ ।  
नमः॑ । नमः॑ । सृ॒का॒वि॒भ्य इति॑ सृ॒का॒वि – भ्यः॑ । जि॒घा॒स॒द्भ्य इति॑  
जि॒घा॒स॒त् – भ्यः॑ । मु॒ष्णा॒ताम् । पतये॑ । नमः॑ । नमः॑ । अ॒सि॒मद्भ्य॑  
इत्य॑सि॒मत् – भ्यः॑ । नक्त॑म् । चर॒द्भ्य इति॑ चर॒त् – भ्यः॑ ।  
प्रकृ॒न्ताना॑मिति॑ प्र – कृ॒न्ताना॑म् । पतये॑ । नमः॑ । नमः॑ । उ॒ष्णी॒षिणे॑ ।

गिरि॑चरा॒येति॑ गिरि॑ – च॒राय॑ । कु॒लुञ्चा॑नाम् । पत॑ये । नमः॑ ।

नमः॑ । 7 (50)

#### **4.5.3.2**

इ॒षुम॑द्भ्यो॒ धन्वा॑विभ्यश्च॒ वो नमो॑  
नम॑ आ॒तन्वा॑नेभ्यः॒ प्रति॑दधानेभ्यश्च॒ वो नमो॑  
नम॑ आ॒यच्छ॑द्भ्यो॒ विसृ॑जद्भ्यश्च॒ वो नमो॑  
नमो॑ऽस्य॑द्भ्यो॒ विध्य॑द्भ्यश्च॒ वो नमो॑  
नम॑ आ॒सीने॑भ्यः॒ शया॑नेभ्यश्च॒ वो नमो॑  
नमः॑ स्व॒पद्भ्यो॑ जाग्रद्भ्यश्च॒ वो नमो॑  
नम॑स्तिष्ठ॑द्भ्यो॒ धाव॑द्भ्यश्च॒ वो नमो॑  
नमः॑ स॒भाभ्यः॑ स॒भाप॑तिभ्यश्च॒ वो नमो॑  
नमो॑ अ॒श्वेभ्यो॑ ऽश्व॒पति॑भ्य ( ) श्च॒ वो नमः॑ । 8

#### **4.5.3.2 - Padam**

इ॒षुम॑द्भ्य इ॒तीषु॑मत् – भ्यः॑ । धन्वा॑विभ्य इति॑ धन्वा॒वि-भ्यः॑ । च॒ ।  
वः॑ । नमः॑ । नमः॑ । आ॒तन्वा॑नेभ्य इत्या॑ – तन्वा॒नेभ्यः॑ ।

प्र॒ति॒द॒धा॒ने॒भ्य॑ इति॑ प्र॒ति – द॒धा॒ने॒भ्यः॑ । च । वः । नमः॑ । नमः॑ ।  
आ॒य॒च्छ॒द्भ्य॑ इत्या॒य॒च्छत् – भ्यः॑ । वि॒सृ॒ज॒द्भ्य॑ इति॑  
वि॒सृ॒जत् – भ्यः॑ । च । वः । नमः॑ । नमः॑ । अ॒स्य॒द्भ्य॑  
इत्य॑स्यत् – भ्यः॑ । वि॒ध्य॒द्भ्य॑ इति॑ वि॒ध्यत् – भ्यः॑ । च । वः । नमः॑ ।  
नमः॑ । आ॒सी॒ने॒भ्यः॑ । श॒या॒ने॒भ्यः॑ । च । वः । नमः॑ । नमः॑ ।  
स्व॒प॒द्भ्य॑ इति॑ स्व॒पत् – भ्यः॑ । जा॒ग्र॒द्भ्य॑ इति॑ जा॒ग्रत् – भ्यः॑ । च ।  
वः । नमः॑ । नमः॑ । ति॒ष्ठ॒द्भ्य॑ इति॑ ति॒ष्ठत् – भ्यः॑ । धा॒व॒द्भ्य॑ इति॑  
धा॒वत् – भ्यः॑ । च । वः । नमः॑ । नमः॑ । स॒भा॒भ्यः॑ । स॒भा॒प॒ति॒भ्य॑  
इति॑ स॒भा॒प॒ति – भ्यः॑ । च । वः । नमः॑ । नमः॑ । अ॒श्वे॑भ्यः ।  
अ॒श्व॒प॒ति॒भ्य॑ इत्य॑श्व॒प॒ति – भ्यः॑ ( ) । च । वः । नमः॑ । 8 (53)

(कु॒लु॒ञ्चा॒नां प॒त॒ये नमो॑ नमो॑ – ऽश्व॒प॒ति॒भ्य॑ – स्त्री॒णि च) (A3)

#### 4.5.4.1

नम॑ आ॒व्या॒धि॒नी॒भ्यो॑ वि॒वि॒ध्य॒न्ती॒भ्यश्च॑ वो॒ नमो॑  
नम॑ उ॒ग॒णा॒भ्य॑-स्तृ॒ह॒ती॒भ्यश्च॑ वो॒ नमो॑

नमो॑ गृ॒थ्सो॑भ्यो॑ गृ॒थ्सप॑तिभ्यश्च वो॒ नमो॑  
नमो॑ ब्रा॒ते॒भ्यो॑ ब्रा॒तप॑तिभ्यश्च वो॒ नमो॑  
नमो॑ ग॒णे॒भ्यो॑ ग॒णप॑तिभ्यश्च वो॒ नमो॑  
नमो॑ वि॒रूपे॑भ्यो॑ वि॒श्वरूपे॑भ्यश्च वो॒ नमो॑  
नमो॑ म॒हद्भ्यः॑ क्षु॒ल्लके॑भ्यश्च वो॒ नमो॑  
नमो॑ र॒थि॒भ्यो॑-र॒थे॒भ्यश्च॑ वो॒ नमो॑  
नमो॑ र॒थे॒भ्यो॑ - [ ] 9

#### **4.5.4.1 - Padam**

नमः॑ । आ॒व्याधि॑नी॒भ्य इ॒त्या - व्या॑धिनी॒भ्यः । वि॒विध्य॑न्ती॒भ्य इति॑  
वि - वि॒ध्यन्ती॒भ्यः । च । वः । नमः॑ । नमः॑ । उ॒गणा॑भ्यः ।  
तृ॒ह॒ती॒भ्यः । च । वः । नमः॑ । नमः॑ । गृ॒थ्सो॑भ्यः । गृ॒थ्सप॑ति॒भ्य  
इति॑ गृ॒थ्सप॑ति - भ्यः । च । वः । नमः॑ । नमः॑ । ब्रा॒ते॒भ्यः ।  
ब्रा॒तप॑ति॒भ्य इति॑ ब्रा॒तप॑ति-भ्यः । च । वः । नमः॑ । नमः॑ । ग॒णे॒भ्यः ।  
ग॒णप॑ति॒भ्य इति॑ ग॒णप॑ति - भ्यः । च । वः । नमः॑ । नमः॑ ।

विरू॑पेभ्य॒ इति॑ वि – रूपे॑भ्यः । विश्व॑रूपेभ्य॒ इति॑ विश्व॑-रूपेभ्यः ।  
च । वः । नमः । नमः । महद्भ्य॒ इति॑ महत्-भ्यः । क्षु॒ल्लके॑भ्यः ।  
च । वः । नमः । नमः । रथि॑भ्य॒ इति॑ रथि॑-भ्यः । अरथे॑भ्यः । च ।  
वः । नमः । नमः । रथे॑भ्यः । 9 (50)

#### 4.5.4.2

रथ॑पतिभ्यश्च वो॒ नमो॑  
नमः॑ से॒नाभ्यः॑ से॒नानि॑भ्यश्च वो॒ नमो॑  
नमः॑ क्ष॒त्तृभ्यः॑ सं॒ग्रही॑तृभ्यश्च वो॒ नमो॑  
नम॑स्तक्ष॒भ्यो रथ॑का॒रेभ्य॑श्च वो॒ नमो॑  
नमः॑ कु॒लाले॑भ्यः क॒र्मरि॑भ्यश्च वो॒ नमो॑  
नमः॑ पु॒ञ्जिष्टे॑भ्यो नि॒षादे॑भ्यश्च वो॒ नमो॑  
नम॑ इषु॒कृद्भ्यो॑ ध॒न्वकृ॑द्भ्यश्च वो॒ नमो॑  
नमो॑ मृ॒गयु॑भ्यः श्वनि॑भ्यश्च वो॒ नमो॑  
नमः॑ श्व॒भ्यः श्व॑पतिभ्यश्च ( ) वो॒ नमः॑ । 10



#### 4.5.4.2 - Padam

रथ॑पति॒भ्य इति॑ रथ॑पति॒-भ्यः । च । वः । नमः॑ । नमः॑ । से॒ना॒भ्यः ।  
से॒ना॒नि॒भ्य इति॑ से॒ना॒नि - भ्यः । च । वः । नमः॑ । नमः॑ । क्ष॒त्तृ॒भ्य  
इति॑ क्ष॒त्तृ - भ्यः । सं॒ग्र॒ही॒तृ॒भ्य इति॑ सं॒ग्र॒ही॒तृ - भ्यः । च । वः ।  
नमः॑ । नमः॑ । तक्ष॑भ्य इति॑ तक्ष॑ - भ्यः । रथ॑का॒रे॒भ्य इति॑  
रथ॑-का॒रे॒भ्यः । च । वः । नमः॑ । नमः॑ । कु॒ला॒ले॒भ्यः । क॒र्म॒रि॒भ्यः ।  
च । वः । नमः॑ । नमः॑ । पु॒ज्जि॒ष्टे॒भ्यः । नि॒षा॒दे॒भ्यः । च । वः ।  
नमः॑ । नमः॑ । इ॒षु॒कृ॒द्भ्य इति॑ इ॒षु॒कृ॒त् - भ्यः । ध॒न्व॒कृ॒द्भ्य इति॑  
ध॒न्व॒कृ॒त् - भ्यः । च । वः । नमः॑ । नमः॑ । मृ॒ग॒यु॒भ्य इति॑  
मृ॒ग॒यु॒-भ्यः । श्व॒नि॒भ्य इति॑ श्व॒नि - भ्यः । च । वः । नमः॑ । नमः॑ ।  
श्व॒भ्य इति॑ श्व॒ - भ्यः । श्व॒पति॑भ्य इति॑ श्व॒पति॑ - भ्यः । च ( ) ।  
वः । नमः॑ । 10 (52) (रथे॑भ्यः - श्व॒पति॑भ्यश्च - द्वे च॑ ) (A4)

#### 4.5.5.1

नमो॑ भ॒वाय॑ च रु॒द्राय॑ च नमः॑ श॒र्वाय॑ च प॒शु॒प॒तये॑ च  
नमो॑ नी॒लग्री॑वाय च शि॒ति॒क॒ण्ठाय॑ च नमः॑ क॒पर्दि॑ने च व्यु॒प्तके॑शाय च

नमः॑ सह॒स्राक्षाय॑ च शत॑धन्व॒ने च नमो॑ गिरि॒शाय॑ च शि॒पिवि॒ष्टाय॑ च  
नमो॑ मी॒ढुष्ट॑माय॒ चेषु॑मते च नमो॑ ह्रस्वाय॑ च वाम॒नाय॑ च  
नमो॑ बृ॒हते॑ च वर्षी॑यसे च नमो॑ वृ॒द्धाय॑ च सं॒वृध्व॑ने च - [ ] 11

**4.5.5.1 - Padam**

नमः॑ । भवाय॑ । च । रु॒द्राय॑ । च । नमः॑ । शर्वा॑य । च । पशु॑पत॒य  
इति॑ पशु-पत॒ये । च । नमः॑ । नील॑ग्रीवायेति नील - ग्रीवाय॑ । च ।  
शि॒तिक॑ण्ठायेति शिति - कण्ठा॑य । च । नमः॑ । कपर्दि॑ने । च ।  
व्यु॒प्तके॑शायेति व्यु॒प्त - केशा॑य । च । नमः॑ । सह॒स्राक्ष॑ायेति  
सह॒स्र-अ॑क्षाय॑ । च । शत॑धन्व॒न इति॑ शत - धन्व॒ने । च । नमः॑ ।  
गिरि॒शाय॑ । च । शि॒पिवि॒ष्टायेति॑ शि॒पि - वि॒ष्टाय॑ । च । नमः॑ ।  
मी॒ढुष्ट॑मायेति मी॒ढुः - त॒माय॑ । च । इषु॑मत॒ इतीषु॑ - म॒ते । च ।  
नमः॑ । ह्रस्वाय॑ । च । वाम॒नाय॑ । च । नमः॑ । बृ॒हते॑ । च ।  
वर्षी॑यसे । च । नमः॑ । वृ॒द्धाय॑ । च ।  
सं॒वृध्व॑न इति॑ सं - वृध्व॒ने । च । 11 (50)

**4.5.5.2**

नमो॑ अ॒ग्रि॒याय॑ च॒ प्रथ॑माय॒ च नम॑ आ॒शवे॑ चाजि॒राय॑ च  
नमः॑ शी॒घ्रि॒याय॑ च॒ शी॒भ्याय॑ च॒ नम॑ ऊ॒र्म्याय॑ चाव॒स्वन्याय॑ च  
नमः॑ स्रो॒तस्याय॑ च॒ द्वी॒प्याय॑ च । 12

**4.5.5.2 - Padam**

नमः॑ । अ॒ग्रि॒याय॑ । च॒ । प्रथ॑माय॒ । च॒ । नमः॑ । आ॒शवे॑ । च॒ ।  
अजि॒राय॑ । च॒ । नमः॑ । शी॒घ्रि॒याय॑ । च॒ । शी॒भ्याय॑ । च॒ । नमः॑ ।  
ऊ॒र्म्याय॑ । च॒ । अव॒स्वन्याये॑त्यव – स्वन्याय॑ । च॒ । नमः॑ ।  
स्रो॒तस्याय॑ । च॒ । द्वी॒प्याय॑ । च॒ । 12 (25)

(सँवृ॑ध्वने॒ च – पञ्च॑वि॒ंशति॑श्च) (A5)

**4.5.6.1**

नमो॑ ज्ये॒ष्ठाय॑ च॒ कनि॑ष्ठाय॒ च नमः॑ पूर्॒वजाय॑ चाप॒रजाय॑ च  
नमो॑ म॒ध्यमाय॑ चाप॒गल्भाय॑ च॒ नमो॑ जघ॒न्याय॑ च॒ बु॒ध्नियाय॑ च॒  
नमः॑ सो॒भ्याय॑ च॒ प्र॒तिस॑र्याय॒ च नमो॑ या॒म्याय॑ च॒ क्षे॒म्याय॑ च॒  
नम॑ उ॒र्वर्याय॑ च॒ ख॒ल्याय॑ च॒ नमः॑ इ॒लोक्याय॑ चाव॒सान्याय॑ च॒  
नमो॑ व॒न्याय॑ च॒ कक्ष्याय॑ च॒ नमः॑ श्र॒वाय॑ च॒ प्र॒तिश्र॑वाय॒ च-[] 13

**4.5.6.1 - Padam**

नमः॑ । ज्ये॒ष्ठाय॑ । च । कनि॒ष्ठाय॑ । च । नमः॑ । पूर्व॒जायेति॑  
पूर्व – जाय । च । अपर॒जायेत्य॑पर-जाय । च । नमः॑ । मध्य॒माय॑ ।  
च । अपगल्भा॒येत्य॑प – गल्भाय॑ । च । नमः॑ । जघ॒न्याय॑ । च ।  
बुध्नि॒याय॑ । च । नमः॑ । सो॒भ्याय॑ । च । प्रति॒सर्था॑येति॑  
प्रति – सर्था॑य । च । नमः॑ । याम्या॑य । च । क्षेम्या॑य । च । नमः॑ ।  
उर्व॒र्याय॑ । च । खल्पा॑य । च । नमः॑ । श्लो॒क्याय॑ । च ।  
अवसा॒न्यायेत्य॑व – सान्याय॑ । च । नमः॑ । वन्या॑य । च । कक्ष्या॑य ।  
च । नमः॑ । श्रवा॑य । च । प्रति॒श्रवा॑येति॑ प्रति-श्रवाय॑ । च । 13 (50)

**4.5.6.2**

नम॑ आ॒शुषे॑णाय॑ चा॒शुर॑थाय॑ च नमः॑ शू॒राय॑ चाव॒भिन्द॑ते च  
नमो॑ वर्मि॒णे च॑ वरू॒थिने॑ च नमो॑ बि॒ल्मिने॑ च क॒वचि॑ने च  
नमः॑ श्रु॒ताय॑ च श्रु॒तसे॑नाय॑ च । 14

**4.5.6.2 - Padam**

नमः॑ । आ॒शु॒षे॒णा॒येत्या॒शु – से॒नाय॑ । च । आ॒शु॒र॒था॒येत्या॒शु-र॒थाय॑ ।  
च । नमः॑ । शू॒राय॑ । च । अ॒व॒भि॒न्द॒त इत्य॑व-भि॒न्द॒ते । च । नमः॑ ।  
व॒र्मि॒णे॑ । च । व॒रू॒थि॒ने॑ । च । नमः॑ । बि॒ल्मि॒ने॑ । च । क॒व॒चि॒ने॑ ।  
च । नमः॑ । श्रु॒ताय॑ । च । श्रु॒त॒से॒ना॒येति॑ श्रु॒त-से॒नाय॑ । च । 14 (25)

(प्र॒ति॒श्र॒वाय॑ च – पञ्च॒विं॒शति॑श्च) (A6)

**4.5.7.1**

नमो॑ दु॒न्दु॒भ्याय॑ चा॒ह॒न॒न्याय॑ च नमो॑ धृ॒ष्ण॒वे च प्र॒मृ॒शाय॑ च  
नमो॑ दू॒ताय॑ च प्र॒हि॒ताय॑ च नमो॑ नि॒ष॒ङ्गि॒णे चेषु॑धि॒मते॑ च  
नम॑ स्ती॒क्ष्णो॒षवे॑ चा॒यु॒धि॒ने च नमः॑ स्वा॒यु॒धाय॑ च सु॒ध॒न्व॒ने च  
नमः॑ स्रु॒त्याय॑ च प॒थ्याय॑ च नमः॑ का॒त्याय॑ च नी॒प्याय॑ च  
नमः॑ सू॒द्याय॑ च सर॒स्याय॑ च नमो॑ ना॒द्याय॑ च वै॒श॒न्ताय॑ च -[ ] 15

**4.5.7.1 - Padam**

नमः॑ । दु॒न्दु॒भ्याय॑ । च । आ॒ह॒न॒न्या॒येत्या॑ – ह॒न॒न्याय॑ । च । नमः॑ ।  
धृ॒ष्ण॒वे॑ । च । प्र॒मृ॒शाय॑ति॑ प्र – मृ॒शाय॑ । च । नमः॑ । दू॒ताय॑ । च ।

प्रहि॑तायेति॑ प्र – हि॒ताय॑ । च । नमः॑ । निष॑ङ्गिण॒ इति॑ नि – स॒ङ्गिने॑ ।  
च । इषु॑धिमत॒ इतीषु॑धि – मते॑ । च । नमः॑ । तीक्ष्णो॑षव॒ इति॑  
तीक्ष्ण॑ – इषवे॑ । च । आयु॑धिने॑ । च । नमः॑ । स्वायु॑धायैति॑  
सु – आयु॑धाय । च । सु॒धन्वन॑ इति॑ सु – धन्व॑ने । च । नमः॑ ।  
स्रु॒त्याय॑ । च । पथ्या॑य । च । नमः॑ । का॒त्याय॑ । च । नी॒प्याय॑ । च ।  
नमः॑ । सू॒द्याय॑ । च । सर॒स्याय॑ । च । नमः॑ । ना॒द्याय॑ । च ।  
वै॒शन्ताय॑ । च । 15 (50)

#### 4.5.7.2

नमः॑ कू॒प्याय॑ चाव॒त्याय॑ च नमो॑ वर्ष्पा॑य चावर्ष्पा॑य च  
नमो॑ मे॒घ्याय॑ च वि॒द्युत्या॑य च नम॑ ई॒ध्रिया॑य चात॒प्याय॑ च  
नमो॑ वा॒त्याय॑ च रे॒ष्मिया॑य च नमो॑ वास्त॒व्याय॑ च वास्तु॒पाय॑ च । 16

#### 4.5.7.2 - Padam

नमः॑ । कू॒प्याय॑ । च । अव॒त्याय॑ । च । नमः॑ । वर्ष्पा॑य । च ।  
अवर्ष्पा॑य । च । नमः॑ । मे॒घ्याय॑ । च । वि॒द्युत्या॑येति॑ वि – द्यु॒त्याय॑ ।  
च । नमः॑ । ई॒ध्रिया॑य । च । आत॒प्यायेत्या॑ – त॒प्याय॑ । च । नमः॑ ।

वा॒त्याय॑ । च॒ । रे॒ष्मि॒याय॑ । च॒ । नमः॑ । वा॒स्त॒व्याय॑ । च॒ ।

वा॒स्तु॒पाये॑ति वा॒स्तु – पा॒य । च॒ । 16 (30)

(वै॒श॒न्ताय॑ च – त्रि॒श॒च्च) (A7)

#### 4.5.8.1

नमः॑ सो॒माय॑ च रु॒द्राय॑ च नम॑स्ता॒म्राय॑ चा॒रु॒णाय॑ च  
नमः॑ श॒ङ्गाय॑ च प॒शु॒पत॑ये च नम॑ उ॒ग्राय॑ च भी॒माय॑ च  
नमो॑ अ॒ग्रे॒व॒धाय॑ च दू॒रे॒व॒धाय॑ च नमो॑ ह॒न्त्रे च ह॒नीय॑से च  
नमो॑ वृ॒क्षे॒भ्यो ह॒रि॒केशे॑भ्यो नम॑स्ता॒राय॑  
नमः॑ शं॒भवे॑ च म॒यो॒भवे॑ च नमः॑ श॒ङ्क॒राय॑ च म॒य॒स्क॒राय॑ च  
नमः॑ शि॒वाय॑ च शि॒व॒त॒राय॑ च – [ ] 17

#### 4.5.8.1 - Padam

नमः॑ । सो॒माय॑ । च॒ । रु॒द्राय॑ । च॒ । नमः॑ । ता॒म्राय॑ । च॒ । अ॒रु॒णाय॑ ।  
च॒ । नमः॑ । श॒ङ्गाय॑ । च॒ । प॒शु॒प॒त॒य इति॑ प॒शु-प॒त॒ये । च॒ । नमः॑ ।  
उ॒ग्राय॑ । च॒ । भी॒माय॑ । च॒ । नमः॑ । अ॒ग्रे॒व॒धायै॑त्य॒ग्रे – व॒धाय॑ ।  
च॒ । दू॒रे॒व॒धायै॑ति दू॒रे – व॒धाय॑ । च॒ । नमः॑ । ह॒न्त्रे । च॒ । ह॒नीय॑से ।

च । नमः । वृक्षेभ्यः । हरिकेशेभ्य इति हरि – केशेभ्यः । नमः ।  
ताराय । नमः । शंभव इति शं – भवे । च । मयोभव इति  
मयः – भवे । च । नमः । शङ्करायैति शं – कराय । च ।  
मयस्करायैति मयः – कराय । च । नमः । शिवाय । च ।  
शिवतरायैति शिव – तराय । च । 17 (50)

#### **4.5.8.2**

नमस्तीर्थाय च कूल्याय च नमः पार्याय चावार्याय च  
नमः प्रतरणाय चोत्तरणाय च नम आतार्याय चालाद्याय च  
नमः शष्याय च फेन्याय च नमः सिकत्याय च प्रवाह्याय च । 18

#### **4.5.8.2 - Padam**

नमः । तीर्थाय । च । कूल्याय । च । नमः । पार्याय । च ।  
आवार्याय । च । नमः । प्रतरणायैति प्र – तरणाय । च ।  
उत्तरणायैत्युत् – तरणाय । च । नमः । आतार्यायेत्या – तार्याय । च ।  
आलाद्यायेत्या – लाद्याय । च । नमः । शष्याय । च । फेन्याय । च ।



नमः॑ । सि॒क॒त्याय॑ । च॒ । प्र॒वा॒ह्या॒येति॑ प्र – वा॒ह्याय॑ । च॒ । 18 (30)

(शि॒व॒त॒राय॑ च – त्रि॒॒श॒च्च॑) (A8)

#### 4.5.9.1

नम॑ इ॒रि॒ण्याय॑ च प्र॒प॒थ्याय॑ च नमः॑ कि॒॒श॒िलाय॑ च क्ष॒य॒णाय॑ च  
नमः॑ क॒प॒र्दि॒ने च॑ पु॒ल॒स्त॒ये च॑ नमो॑ गो॒ष्ठ्याय॑ च गृ॒ह्याय॑ च  
नम॑स्त॒ल्प्याय॑ च गे॒ह्याय॑ च नमः॑ का॒त्याय॑ च ग॒ह्व॒रे॒ष्ठाय॑ च  
नमो॑ हृ॒द॒य्याय॑ च नि॒वै॒ष्याय॑ च नमः॑ पा॒॒स॒व्याय॑ च र॒ज॒स्याय॑ च  
नमः॑ शु॒ष्क्याय॑ च ह॒रि॒त्याय॑ च नमो॑ लो॒प्याय॑ चो॒ल॒प्याय॑ च-[ ] 19

#### 4.5.9.1 - Padam

नमः॑ । इ॒रि॒ण्याय॑ । च॒ । प्र॒प॒थ्या॒येति॑ प्र – प॒थ्याय॑ । च॒ । नमः॑ ।  
कि॒॒श॒िलाय॑ । च॒ । क्ष॒य॒णाय॑ । च॒ । नमः॑ । क॒प॒र्दि॒ने । च॒ ।  
पु॒ल॒स्त॒ये । च॒ । नमः॑ । गो॒ष्ठ्या॒येति॑ गो – स्थाय॑ । च॒ । गृ॒ह्याय॑ ।  
च॒ । नमः॑ । त॒ल्प्याय॑ । च॒ । गे॒ह्याय॑ । च॒ । नमः॑ । का॒त्याय॑ । च॒ ।  
ग॒ह्व॒रे॒ष्ठाय॑येति॑ ग॒ह्व॒रे – स्थाय॑ । च॒ । नमः॑ । हृ॒द॒य्याय॑ । च॒ ।  
नि॒वै॒ष्या॒येति॑ नि – वै॒ष्याय॑ । च॒ । नमः॑ । पा॒॒स॒व्याय॑ । च॒ ।

रज॒स्याय॑ । च॒ । नमः॑ । शु॒ष्क्याय॑ । च॒ । हरि॒त्याय॑ । च॒ । नमः॑ ।  
लो॒प्याय॑ । च॒ । उ॒ल॒प्याय॑ । च॒ । 19 (50)

#### 4.5.9.2

नम॑ ऊ॒र्व्याय॑ च॒ सू॒र्म्याय॑ च॒ नमः॑ प॒र्ण्याय॑ च॒ पर्ण॑श॒द्याय॑ च॒  
नमो॑ऽप॒गुर॒मा॒णाय॑ चाभि॒घ्नते॑ च॒ नम॑ आ॒क्खि॒दते॑ च॒ प्र॒क्खि॒दते॑ च॒  
नमो॑ वः॒ कि॒रि॒केभ्यो॑ दे॒वाना॑ँ हृद॒येभ्यो॑ नमो॑ वि॒क्षी॒णके॑भ्यो  
नमो॑ वि॒चि॒न्वत्के॑भ्यो नम॑ आ॒निर्ह॑तेभ्यो नम॑ आ॒मीव॑त्केभ्यः । 20

#### 4.5.9.2 - Padam

नमः॑ । ऊ॒र्व्याय॑ । च॒ । सू॒र्म्याय॑ । च॒ । नमः॑ । प॒र्ण्याय॑ । च॒ ।  
पर्ण॑श॒द्यायेति॑ पर्ण॑ – श॒द्याय॑ । च॒ । नमः॑ ।  
अ॒प॒गुर॒मा॒णाय॑ेत्यप॑ – गु॒र॒मा॒णाय॑ । च॒ । अ॒भि॒घ्नत॑ इत्य॒भि – घ्नते॑ ।  
च॒ । नमः॑ । आ॒क्खि॒दत॑ इत्या॑ – खि॒दते॑ । च॒ । प्र॒क्खि॒दत॑ इति॑  
प्र॒-खि॒दते॑ । च॒ । नमः॑ । वः॒ । कि॒रि॒केभ्यः॑ । दे॒वाना॑म् । हृद॒येभ्यः॑ ।  
नमः॑ । वि॒क्षी॒णके॑भ्य इति॑ वि – क्षी॒णके॑भ्यः । नमः॑ । वि॒चि॒न्वत्के॑भ्य  
इति॑ वि – चि॒न्वत्के॑भ्यः । नमः॑ । आ॒निर्ह॑तेभ्य इत्या॑निः – ह॒तेभ्यः॑ ।

नमः॑ । आ॒मी॒व॒त्के॒भ्य इ॒त्या॑ – मी॒व॒त्के॒भ्यः॑ । 20 (33)

(उ॒ल॒प्या॒य च॒ – त्र॒य॒स्त्रि॒श॒च्च) (A9)

#### 4.5.10.1

द्रा॒पे॒ अ॒न्ध॒स॒स्प॒ते॒ द॒रि॒द्र॒न्नी॒ल॒लो॒हि॒त ।

ए॒षां पु॒रु॒षा॒णामे॒षां प॒शूनां॑ मा भे॒ र्मा॒रु॒मो ए॒षां किञ्च॒नाम॑मत् ।

या ते॑ रु॒द्र शि॒वा त॒नूः शि॒वा वि॒श्वाह॑भेष॒जी ।

शि॒वा रु॒द्रस्य॑ भेष॒जी तया॑ नो मृ॒ड जी॒वसे॑ ।

इ॒मा रु॒द्राय॑ तव॒से क॒प॒दि॒ने क्ष॒य॒द्वी॒राय॑ प्र॒भ॒राम॑हे म॒तिं ।

यथा॑ नः॒ श॒म॒स॒द् द्वि॒पदे॑ च॒तु॒ष्पदे॑ वि॒श्वं पु॒ष्टं ग्रा॒मे अ॒स्मि – [ ] 21

#### 4.5.10.1 - Padam

द्रा॒पे॒ । अ॒न्ध॒सः॑ । प॒ते॒ । द॒रि॒द्र॒त् । नी॒ल॒लो॒हि॒ते॒ति॒ नी॒ल – लो॒हि॒त ।

ए॒षाम् । पु॒रु॒षा॒णाम् । ए॒षाम् । प॒शूनाम् । मा । भेः॑ । मा । अ॒रः॑ ।

मो॑ इति॑ । ए॒षाम् । किम् । च॒न । आ॒म॒मत् । या । ते॑ । रु॒द्र । शि॒वा ।

त॒नूः । शि॒वा । वि॒श्वाह॑भेष॒जीति॑ वि॒श्वाह॑-भेष॒जी । शि॒वा । रु॒द्रस्य॑ ।

भेष॒जी । तया॑ । नः॑ । मृ॒ड । जी॒वसे॑ । इ॒माम् । रु॒द्राय॑ । तव॒से॑ ।

क॒प॒र्दि॒ने॑ । क्ष॒य॒द्वी॒रा॒येति॑ क्ष॒य॒त् – वी॒रा॒य॒ । प्रेति॑ । भ॒रा॒म॒हे॒ । म॒ति॒म् ।  
य॒था॒ । नः॑ । श॒म् । अ॒स॒त् । द्वि॒प॒द॒ इति॑ द्वि – प॒दे॑ । च॒तु॒ष्प॒द॒ इति॑  
च॒तुः॑ – प॒दे॑ । वि॒श्व॒म् । पु॒ष्ट॒म् । ग्रा॒मे॑ । अ॒स्मिन् । 21 (50)

#### 4.5.10.2

न॒ना॒तु॒रं॑ । मृ॒डा नो॑ रु॒द्रो त॒नो म॒य॒स्कृ॒धि क्ष॒य॒द्वी॒रा॒य॒ नम॑सा वि॒धेम॑ ते ।  
य॒च्छं च॑ योश्च॒ म॒नु॒रा॒य॒जे पि॒ता तद॑श्याम॒ तव॑ रु॒द्र प्र॒णी॒तौ ।  
मा नो॑ म॒हान्त॑मु॒त मा नो॑ अ॒र्भ॒कं मा न॑ उ॒क्षन्त॑मु॒त मा न॑ उ॒क्षि॒तं ।  
मा नो॑ व॒धीः पि॒तरं॑ मो॒त मा॒तरं॑ प्रि॒या मा न॑स्त॒नुवो॑ – [ ] 22

#### 4.5.10.2 - Padam

अ॒ना॒तु॒र॒मि॒त्य॒ना॑ – तु॒र॒म् । मृ॒ड॒ । नः॑ । रु॒द्र॒ । उ॒त॒ । नः॑ । म॒यः॑ ।  
कृ॒धि॒ । क्ष॒य॒द्वी॒रा॒येति॑ क्ष॒य॒त् – वी॒रा॒य॒ । नम॑सा । वि॒धेम॑ । ते॒ । य॒त् ।  
श॒म् । च॒ । योः॑ । च॒ । म॒नुः॑ । आ॒य॒ज॒ इत्या॑ – य॒जे॑ । पि॒ता । त॒त् ।  
अ॒श्या॒म॒ । तव॑ । रु॒द्र॒ । प्र॒णी॒ता॒वि॒ति॒ प्र – नी॒तौ॑ । मा॒ । नः॑ ।  
म॒हा॒न्त॑म् । उ॒त॒ । मा॒ । नः॑ । अ॒र्भ॒क॑म् । मा॒ । नः॑ । उ॒क्ष॒न्त॑म् । उ॒त॒ ।

मा । नः । उ॒क्षित॑म् । मा । नः । व॒धीः । पि॒तर॑म् । मा । उ॒त ।  
मा॒तर॑म् । प्रि॒याः । मा । नः । त॒नुवः । 22 (50)

#### 4.5.10.3

रु॒द्र री॒रिषः ।

मा न॑स्तो॒के तन॑ये मा न॒ आयु॑षि मा नो॒ गोषु॑ मा नो॒ अश्वे॑षु री॒रिषः ।  
वी॒रान् मा॒नो रु॒द्र भा॒मितो॑ व॒धी-ह॑विष्मन्तो॒ नम॑सा वि॒धेम ते॑ ।  
आ॒रात्ते॑ गो॒घ्न उ॒त पू॒रुष॑घ्ने क्षय॑द्वी॒राय सु॒म्नम॑स्मो ते॑ अस्तु ।  
र॒क्षा च नो॒ अधि॑ च दे॒व ब्रू॑ह्य॒धा च नः॑ शर्म॒ यच्छ॑ द्वि॒बर्हाः॑ ।

स्तु॒हि – [ ] 23

#### 4.5.10.3 - Padam

रु॒द्र । री॒रिषः । मा । नः । तो॒के । तन॑ये । मा । नः । आयु॑षि । मा ।  
नः । गोषु॑ । मा । नः । अश्वे॑षु । री॒रिषः । वी॒रान् । मा । नः । रु॒द्र ।  
भा॒मितः । व॒धीः । ह॑विष्मन्तः । नम॑सा । वि॒धेम । ते॑ । आ॒रात् । ते॑ ।  
गो॒घ्न इति॑ गो – घ्ने । उ॒त । पू॒रुष॑घ्न इति॑ पू॒रुष – घ्ने ।  
क्षय॑द्वी॒रायेति॑ क्षय॑त् – वी॒राय । सु॒म्नम् । अ॒स्मो इति॑ । ते॑ । अस्तु॑ ।

रक्ष॑ । च॒ । नः॒ । अधी॑ति । च॒ । दे॒व । ब्रू॒हि । अध॑ । च॒ । नः॒ ।  
शर्म॑ । यच्छ॑ । द्वि॒र्बर्हा॑ इति॑ द्वि – बर्हाः॑ । स्तु॒हि । 23 (50)

**4.5.10.4**

श्रु॒तं ग॒र्त्तस॑दं यु॒वानं॑ मृ॒गं न॒ भीम॑-मु॒पह॑न्तु-मु॒ग्रं ।  
मृ॒डा ज॒रित्रे॑ रु॒द्र स्त॒वानो॑ अ॒न्यन्ते॑ अ॒स्मन्नि॒वप॑न्तु से॒नाः ।  
प॒रिणो॑ रु॒द्रस्य॑ हे॒ति वृ॑णक्तु प॒रित्वे॑षस्य॑ दु॒र्मति॑रघा॒योः ।  
अ॒व स्थि॑रा म॒घव॑द्भ्य-स्त॒नुष्व मी॑द्वस्तो॒काय॑ त॒नया॑य मृ॒डय॑ ।  
मी॒दुष्ट॑म शि॒वत॑म शि॒वो नः॑ सु॒मना॑ भव ।  
प॒रमे॑ वृ॒क्ष आ॒युधं॑ नि॒धाय॑ कृ॒त्तिं व॑सान आ॒चर॑ पि॒नाकं॑ – [ ] 24

**4.5.10.4 - Padam**

श्रु॒तम् । ग॒र्त्तस॑दमि॒ति ग॒र्त्त-स॑दम् । यु॒वानम् । मृ॒गम् । न॒ । भी॒मम् ।  
उ॒पह॑न्तुम् । उ॒ग्रम् । मृ॒ड । ज॒रित्रे॑ । रु॒द्र । स्त॒वानः । अ॒न्यम् । ते॒ ।  
अ॒स्मत् । नी॒ति । व॒पन्तु॑ । से॒नाः । प॒रीति॑ । नः॑ । रु॒द्रस्य॑ । हे॒तिः ।  
वृ॒णक्तु॑ । प॒रीति॑ । त्वे॑षस्य॑ । दु॒र्मति॑रिति॑ दुः – म॒तिः ।  
अ॒घा॒योरि॑त्य॒घ – योः॑ । अ॒वेति॑ । स्थि॒रा ।

म॒घव॑द्भ्य॒ इति॑ म॒घव॑त् – भ्यः॒ । त॒नुष्व॑ । मी॒द्वः॑ । तौ॒काय॑ ।  
त॒नया॑य । मृ॒डय॑ । मी॒दुष्ट॑मेति॒ मी॒दुः – त॒म । शि॒वत॑मेति॒  
शि॒व – त॒म । शि॒वः । नः॒ । सु॒मना॑ इति॒ सु – म॒नाः॑ । भ॒व ।  
प॒रमे॑ । वृ॒क्षे । आ॒युध॑म् । नि॒धाये॑ति नि – धा॒य । कृ॒त्तिम्॑ । व॒सानः॑ ।  
ए॒ति । च॒र । पि॒नाक॑म् । 24 (50)

#### **4.5.10.5**

बि॒भ्रदा॑गहि॒ । वि॒कि॒रि॒द विलो॑हित॒ नम॑स्ते अस्तु॒ भग॑वः ।  
यास्ते॑ स॒हस्र॑ ह॒ेतयो॑ऽन्य॒-म॒स्मन्नि॑ व॒पन्तु॑ ताः ।  
स॒हस्रा॑णि स॒हस्र॑धा बा॒हुवो॑स्तव हे॒तयः॑ ।  
तासा॑मी॒शानो॑ भग॒वः प॒राची॑ना॒ मुखा॑ कृ॒धि । 25

#### **4.5.10.5 - Padam**

बि॒भ्रत् । ए॒ति । ग॒हि । वि॒कि॒रि॒देति॑ वि – कि॒रि॒द । विलो॑हितेति॒  
वि – लो॒हित॑ । नमः॑ । ते॒ । अस्तु॑ । भग॒व इति॑ भग – वः ।  
याः । ते॒ । स॒हस्र॑म् । हे॒तयः॑ । अ॒न्यम् । अ॒स्मत् । नी॒ति । व॒पन्तु॑ ।  
ताः । स॒हस्रा॑णि । स॒हस्र॑धेति॒ सहस्र॑-धा । बा॒हुवोः॑ । तव॑ । हे॒तयः॑ ।

ता॒साम् । ई॒शानः॑ । भ॒गव॑ इति॑ भ॒ग – वः॑ । प॒राची॑ना॒ । मु॒खा॑ ।  
कृ॒धि । 25 (29) (अ॒स्मि॒ – स्त॒नुवः॑ – स्तु॒हि – पि॒नाक॑ –  
मे॒का॒न्न त्रि॒श॒च्च) (A10)

**4.5.11.1**

स॒हस्रा॑णि स॒हस्र॑शो॒ ये रु॒द्रा अ॒धि भू॒म्यां॑ ।  
तेषा॑ः स॒हस्र॑योजने॒ ऽव॒धन्वा॑नि तन्म॒सि ।  
अ॒स्मिन्–म॒ह॒त्य॒र्ण॒वे–ऽन्त॑रि॒क्षे भ॒वा अ॒धि ।  
नी॒लग्री॑वाः शि॒ति॒कण्ठाः॑ श॒र्वा अ॒धः क्ष॒माच॑राः ।  
नी॒लग्री॑वाः शि॒ति॒कण्ठा॑ दि॒वः रु॒द्रा उ॒पश्रि॑ताः ।  
ये वृ॒क्षे॒षु स॒स्पि॒ज्जरा॑ नी॒लग्री॑वा विलो॒हिताः॑ ।  
ये भू॒ताना॑–म॒धि॒प॒तयो॑ वि॒शि॒खा॒सः क॒प॒र्दि॒नः ।  
ये अ॒न्ने॒षु वि॒वि॒ध्यन्ति॑ पा॒त्रे॒षु पि॒ब॒तो ज॒नान्॑ ।  
ये प॒थां प॒थि॒रक्ष॑य ऐ॒ल॒बृ॒दा य॒व्यु॒धः । ये ती॒र्थानि॑ – [ ] 26



**4.5.11.1 - Padam**

सहस्रा॑णि । सहस्र॑श इति॑ सहस्र – शः । ये । रुद्राः । अधी॑ति ।  
भूम्या॑म् । तेषा॑म् । सहस्र॑योजन इति॑ सहस्र – योज॑ने । अवे॑ति ।  
धन्वा॑नि । तन्म॑सि । अस्मि॑न् । मह॑ति । अर्ण॑वे । अन्तरि॑क्षे । भवाः ।  
अधि॑ । नीलग्री॑वा इति॑ नील – ग्री॒वाः । शिति॑कण्ठा इति॑  
शिति॑ – कण्ठाः । शर्वाः । अधः । क्षमा॑चराः । नीलग्री॑वा इति॑  
नील॑-ग्री॒वाः । शिति॑कण्ठा इति॑ शिति॑ – कण्ठाः । दिव॑म् । रुद्राः ।  
उप॑श्रिता इत्यु॑प – श्रिताः । ये । वृक्षे॑षु । सस्मि॑ञ्जराः । नीलग्री॑वा  
इति॑ नील – ग्री॒वाः । विलो॑हिता इति॑ वि – लोहि॑ताः । ये ।  
भूता॑नाम् । अधि॑पतय इत्यधि॑ – पत॑यः । विशि॑खास इति॑  
वि – शि॒खासः । कप॑र्दिनः । ये । अन्ने॑षु । विवि॑ध्यन्तीति॑  
वि – वि॑ध्यन्ति । पात्रे॑षु । पिब॑तः । जना॑न् । ये । प॒थाम् । प॒थिरक्ष॑य  
इति॑ प॒थि – रक्ष॑यः । ऐल॑बृ॒दाः । यव्यु॑धः । ये । ती॒र्थानि॑ । 26 (50)

**4.5.11.2**

प्र॒चर॑न्ति॒ सृ॒का॒वन्तो॑ नि॒षङ्गि॑णः ।  
य ए॒ता॒वन्त॑श्च॒ भू॒या॒ꣳसश्च॑ दि॒शो॑ रु॒द्रा वि॑त॒स्थि॒रे ।  
तेषा॑ꣳ स॒हस्र॑योजने॒ ऽव॑ध॒न्वानि॑ तन्म॒सि ।  
नमो॑ रु॒द्रेभ्यो॑ ये पृ॒थि॒व्यां ये॑ꣳअन्तरि॑क्षे॒ ये दि॒वि येषा॑मन्नं  
वा॒तो वर्ष॑मिष॒वस्तेभ्यो॑ द॒श प्रा॒ची द॑श॒दक्षि॑णा द॒शप्र॑तीची  
द॒शोदी॑ची द॒शोर्ध्वा-स्तेभ्यो॑ नम॒स्ते नो॑ मृ॒डय॑न्तु ते यं द्वि॒ष्मो यश्च॑  
( ) नो॑ द्वेष्टि॒ तं वो॑ ज॒म्भे द॑धामि । 27

**4.5.11.2 - Padam**

प्र॒चर॑न्तीति॒ प्र - च॑रन्ति । सृ॒का॒वन्त॑ इति॒ सृ॒का - व॑न्तः । नि॒षङ्गि॑ण  
इति॒ नि - स॑ङ्गि॒नः । ये । ए॒ता॒वन्तः । च । भू॒या॒ꣳसः । च । दि॒शः ।  
रु॒द्राः । वि॒त॒स्थि॒र इति॑ वि - त॒स्थि॒रे । तेषा॑म् । स॒हस्र॑योजन इति॑  
स॒हस्र॑ - योज॒ने । अवे॑ति । ध॒न्वा॒नि । तन्म॒सि । नमः॑ । रु॒द्रेभ्यः॑ ।  
ये । पृ॒थि॒व्याम् । ये । अन्तरि॑क्षे । ये । दि॒वि । येषा॑म् । अन्न॑म् ।  
वा॒तः । वर्ष॑म् । इष॒वः । तेभ्यः॑ । द॒श । प्रा॒चीः । द॒श । द॒क्षि॒णा ।

पद पाठे (वाक्य सहित) – चतुर्थकाण्डे – पञ्चमः प्रश्नः

द॒श । प्र॒ती॒चीः॑ । द॒श । उ॒दी॒चीः॑ । द॒श । ऊ॒र्ध्वाः॑ । ते॒भ्यः॑ । नमः॑ ।  
ते । नः॑ । मृ॒डय॑न्तु । ते । यम् । द्वि॒ष्मः॑ । यः । च ( ) । नः॑ । द्वेष्टि॑ ।  
तम् । वः॑ । ज॒म्भे॑ । द॒धामि॑ । 27 (56) (ती॒र्था॒नि – यश्च॑ – षट् च॑ )  
(A11)

**Prasna Korvai with starting Padams of 1 to 11 Anuvaakams :-**

(नम॑स्ते रु॒द्र – नमो॑ हिर॒ण्यबा॑हवे – नमः॑ सह॒मानाय॑ – नम॑  
आ॒व्या॒धिनी॑भ्यो – नमो॑ भ॒वाय॑ – नमो॑ ज्ये॒ष्ठाय॑ – नमो॑ दु॒न्दु॒भ्याय॑  
– नमः॑ सो॒माय॑ – नम॑ इ॒रि॒ण्याय॑ – द्रा॒पे – सह॒स्रा – ण्ये॒काद॑श)

**Korvai with starting Padams of 1, 11, 21 Series of Panchaatis :-**

(नम॑स्ते रु॒द्र – नमो॑ भ॒वाय॑ – द्रा॒पे – स॒प्तविं॑शतिः)

**First and Last Padam of Fifth Prasnam of Kandam 4:-**

(नम॑स्ते रु॒द्र – तं वो॑ ज॒म्भे द॒धामि॑)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पद पाठे

चतुर्थ काण्डे पञ्चमः प्रश्नः समाप्तः ॥

## पद पाठे (वाक्य सहित) – चतुर्थकाण्डे – पञ्चमः प्रश्नः

---

### Details of Panchati and Padam for Kandam 4 – Prasanam 5 – TS 4.5

	Panchati	Padams
Anuvakam 1	4	222
Anuvakam 2	2	79
Anuvakam 3	2	103
Anuvakam 4	2	102
Anuvakam 5	2	75
Anuvakam 6	2	75
Anuvakam 7	2	80
Anuvakam 8	2	80
Anuvakam 9	2	83
Anuvakam 10	5	229
Anuvakam 11	2	106
Total →	27	1234

#### Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site [www.vedavms.in](http://www.vedavms.in)